

Na osnovu člana 10. i 12. Zakona o udruženjima i fondacijama Bosne i Hercegovine ("Službeni glasnik BiH" broj 32/01, 42/03, 63/08 i 76/11) i člana 22. stav 3. Zakona o sportu u Bosni i Hercegovini ("Službeni glasnik BiH" broj 27/08 i 102/09), Osnivačka Skupština Plivačkog saveza Bosne i Hercegovine, na sjednici održanoj dana 12.11.2011. godine u Sarajevu usvojila je:

## **STATUT PLIVAČKOG SAVEZA BOSNE I HERCEGOVINE**

### **I - OPŠTE ODREDBE**

#### Član 1.

Plivački savez Bosne i Hercegovine (u daljem tekstu: Savez), osnovan je Odlukom o osnivanju Plivačkog saveza Bosne i Hercegovine donesenoj na osnivačkoj Skupštini održanoj dana 12.11.2011. godine, na osnovu odluke Skupštine Plivačkog saveza Federacije Bosne i Hercegovine broj: 300-05/11 od 27.08.2011.godine i Plivačkog saveza Republike Srpske broj: 21-03/11 od 21.10.2011. godine, u skladu Zakonom o udruženjima i fondacijama Bosne i Hercegovine i Zakonom o sportu u Bosni i Hercegovini.( u daljem tekstu: Zakon o sportu).

#### Član 2.

Ovim Statutom u skladu sa članom 12. Zakona o udruženjima i fondacijama Bosne i Hercegovine ( u daljem tekstu: Zakon) uređuje se:

- naziv, skraćeni naziv i sjedište Saveza;
- ciljevi i djelatnosti Saveza;
- postupak za primanje i isključivanje članova Saveza;
- organi Saveza, način izbora organa upravljanja, ovlaštenja, donošenja odluka, trajanje mandata, uslovi i način raspuštanja organa, odnosno prestanka rada;
- opis, oblik i sadržaj pečata i znaka Saveza;
- sredstva za rad i finansiranje Saveza, pravila za korištenje i raspolaganje sredstvima Saveza, organ koji vrši nadzor nad korištenjem sredstava;
- javnost rada Saveza;
- opšti akti Saveza, odnosno postupak za izmjene i dopune Statuta, ovlaštenja i način donošenja drugih opštih akata;
- zastupanje i predstavljanje Saveza;
- uslovi i postupak za spajanje, podjelu, odnosno prestanak rada Saveza, uključujući i bilo kakav poseban kvorum ili pravila za postizanje kvalificirane većine u postupku glasanja;
- druga pitanja od značaja za organizaciju i djelovanje Saveza.

#### Član 3.

Plivački savez Bosne i Hercegovine (u daljem tekstu: Savez) je nevladina, nestranačka, nezavisna, neprofitna sportska organizacija, osnovana u cilju unapređenja i razvoja plivačkog sporta u Bosni i Hercegovini, u skladu sa Zakonom i ovim Statutom.

Savez ne dopušta rasnu, nacionalnu, vjersku, polnu i političku diskriminaciju, te kršenje sloboda i prava čovjeka.

#### Član 4.

Savez ima svojstvo pravnog lica, koje stiče upisom u Registar kod nadležnog Ministarstva. Savez u pravnom prometu nastupa samostalno i u svoje ime i u okviru svojih pravnih mogućnosti će obavljati svoje pravne poslove.

Za obaveze preuzete u pravnom prometu, Savez odgovara svojom cjelokupnom imovinom (potpuna odgovornost).

Savez ima svoj žiro račun.

## II – NAZIV, SJEDIŠTE I PODRUČJE DJELOVANJA SAVEZA

#### Član 5.

Naziv Saveza je : Plivački savez Bosne i Hercegovine  
Пливачки савез Босне и Херцеговине  
Plivački savez Bosne i Hercegovine

Skraćeni naziv glasi: PS BiH, ПС БиХ, PS BiH.

Naziv Saveza na engleskom jeziku je: Swimming Federation of Bosnia and Herzegovina.

Naziv Saveza je istovjetan na sva tri službena jezika koja su u upotrebi u Bosni i Hercegovini. Službena upotreba je na ćirilicom i latiničnom pismu.

#### Član 6.

Savez djeluje na cijelom području Bosne i Hercegovine .

#### Član 7.

Sjedište Saveza je u Laktašima, ulica Majke Jugovića 20.

## III – CILJEVI I DJELATNOSTI SAVEZA

#### Član 8.

Ciljevi i djelatnosti Saveza:

- ❖ Unapređenje, planiranje i omasovljenje i razvijanje plivačkog sporta u Bosni i Hercegovini;
- ❖ Organizovanje, unapređenje i koordinacija aktivnosti članova Saveza;
- ❖ Saradnja sa odgovarajućim državnim, društvenim, naučnim i stručnim, domaćim i međunarodnim organizacijama na unapređenju plivačkog sporta;
- ❖ Organizovanje domaćih i međunarodnih plivačkih takmičenja u Bosni i Hercegovini;
- ❖ Obrazovanje i usavršavanje stručnih kadrova-trenera, instruktora, sudija i drugih;

- ❖ Donošenje i ostvarivanje dugoročnih i kratkoročnih planova i programa razvoja plivačkog sporta u skladu sa Strategijom razvoja sporta u Bosni i Hercegovini;
- ❖ Donošenje osnova sistema i kalendara takmičenja u organizaciji Saveza;
- ❖ Utvrđivanje kriterija za dodjelu nagrada i priznanja za ostvarene rezultate;
- ❖ Briga o pripremi za nastupe članova državne reprezentacije na zvaničnim međunarodnim takmičenjima;
- ❖ Usklađivanje aktivnosti članova Saveza, zaštita i poštivanje prava članova i rješavanje sporova među njima.

#### **IV-POSTUPAK ZA PRIJEM I PRESTANAK ČLANSTVA**

##### **Član 9.**

Svojstvo člana Saveza mogu steći sva pravna lica – savezi koji su registrovani kod nadležnih organa za obavljanje djelatnosti plivačkog sporta, u skladu sa Zakonom.

Članstvo u Savezu je dobrovoljno.

Članovi Saveza mogu biti:

- Redovni
- Pridruženi
- Počasni

Redovni članovi Saveza su lica iz stava 1. ovog člana.

Odluku o prijemu novih članova donosi Skupština Saveza.

Redovni članovi potpisuju izjavu o prihvatanju Statuta i ciljeva Saveza.

Pridruženi članovi pristupaju Savezu radi sudjelovanja u realizaciji ciljeva Saveza.

Počasni članovi su lica koja materijalno ili na drugi način pomažu rad Saveza bez prava glasa.

Počasni članovi učestvuju u radu Saveza savjetodavnom funkcijom.

Pridruženi i počasni članovi mogu biti pojedinci i pravna lica.

Naziv počasnog člana dodjeljuje Skupština na prijedlog Upravnog odbora.

Savez vodi spisak članova Saveza.

##### **Član 10.**

Članovi Saveza imaju jednaka prava da:

- preko svojih predstavnika aktivno učestvuju u radu i odlučivanju u svim organima i radnim tijelima Saveza;
- njihovi predstavnici biraju i budu birani u organe i radna tijela Saveza;
- aktivno učestvuju u utvrđivanju programa i plana rada Saveza i njihovoj realizaciji;
- ostvaruju uvid u rad Saveza, pokreću akcije, predlažu i preduzimaju mjere za ostvarivanje ciljeva, zadataka i programa rada Saveza;
- ostvaruju zaštitu svojih prava.

##### **Član 11.**

Članovi Saveza su obavezni da:

- poštuju odredbe Statuta i drugih opštih akata Saveza;
- međusobno saraduju radi ostvarivanja ciljeva i zadataka utvrđenih ovim Statutom, drugim aktima Saveza i odlukama njegovih organa;
- aktivno učestvuju u obezbjeđenju realizacije usvojenih programa i planova Saveza i drugih obaveza od interesa za plivački sport u cjelini;
- učestvuju u stručnim aktivnostima Saveza;

- rade i postupaju u skladu sa ovim Statutom i drugim aktima Saveza;
- razvijaju sportski duh i moralne vrijednosti kod sportista, sportskih radnika i plivačkih - sportskih organizacija u cjelini;
- vode posebnu brigu o realizaciji programa priprema i nastupima kandidata za Reprezentacije - selekcije Bosne i Hercegovine;
- učestvuju u finansiranju troškova Saveza u skladu sa usvojenim finansijskim planovima i čuvanju njegove imovine.

#### Član 12.

U slučaju izuzetnih zasluga, osnivačima, donatorima i ostalim članovima Saveza može se dodijeliti priznanje Saveza.

Odluku o tome donosi Upravni odbor Saveza sa najmanje pet glasova svih članova Upravnog odbora, a pismeno priznanje potpisuje Predsjednik Upravnog odbora.

#### Član 13.

Članstvo u Savezu prestaje:

- dobrovoljnim istupanjem člana Saveza;
- gubljenjem svojstva pravnog lica člana Saveza;
- prestankom rada Saveza.

#### Član 14.

Udružena članica Saveza može povući svoje članstvo iz Saveza po vlastitoj volji na kraju finasijske godine pod uslovom da je to najavila kancelariji Saveza najkasnije tri mjeseca prije isteka finasijske godine.

Povlačenje se najavljuje pismeno preporučenom poštom na adresu kancelarije Saveza .

Član Saveza mora izmiriti svoje finasijske obaveze prema Savezu prije nego što se povuče.

#### Član 15.

Predstavnik člana Saveza u organima ili radnim tijelima Saveza koji djeluje suprotno odredbama Statuta, pravilnika i odluka Saveza, ne izvršava svoje obaveze ili svojim postupcima narušava ugled Saveza, može biti opozvan od strane članice Saveza, kao i na prijedlog organa ili radnog tijela Saveza u kojeg je izabran ili imenovan.

Prije donošenja odluke o opozivu, predstavnik člana Saveza mora biti pismeno obaviješten o prijedlogu za opoziv, kao i razlozima zbog kojih se opoziv predlaže.

Odluku o opozivu iz organa ili radnih tijela Saveza donosi Upravni odbor člana Saveza.

Predstavnik člana Saveza u organima ili radnim tijelima Saveza , koji je nezadovoljan odlukom iz prethodnog stava, može uložiti prigovor Skupštini članice Saveza u roku od 15 dana od dana prijema obavijesti.

Odluka Skupštine člana Saveza po žalbi je konačna.

## **V- ORGANI SAVEZA**

### **Član 16.**

Organi Saveza su :

1. Skupština;
2. Upravni odbor;
3. Nadzorni odbor;
4. Predsjednik i Potpredsjednik Saveza;
5. Generalni sekretar

### **1. SKUPŠTINA SAVEZA**

#### **Član 17.**

Skupština Saveza je najviši organ upravljanja Saveza.

Skupštinu Saveza čine 32 člana - predstavnici imenovani od članica osnivača Saveza i to: 16 delegata iz Plivačkog saveza Federacije Bosne i Hercegovine (u daljem tekstu: PS FBiH) i 16 delegata iz Plivačkog saveza Republike Srpske (u daljem tekstu: PS RS).

Skupština Saveza ima predsjednika i potpredsjednika Skupštine koje imenuje i razrješava Skupština Saveza.

Mandat predsjednika i potpredsjednika je četiri godine.

Predsjednik i Potpredsjednik su iz različitih članica.

#### **Član 18.**

Skupština može biti redovna i vanredna.

Redovna Skupština se saziva najmanje jedan put godišnje.

Skupštinu saziva predsjednik Skupštine najkasnije u roku od 30 dana prije njenog zasjedanja, a materijale dostaviti najkasnije u roku 15 dana prije njenog zasjedanja.

Predsjednik je dužan sazvati vanrednu Skupštinu u slučaju kada to zahtjeva najmanje 1/3 članova Skupštine ili kada to zatraži predsjednik Upravnog odbora, ili Nadzornog odbora ili jedna od članica saveza.

#### **Član 19.**

Ako Predsjednik ne sazove vanrednu Skupštinu u roku od 15 dana, u slučajevima iz člana 18.ovog Statuta, odluku o sazivanju Skupštine donijet će predlagač.

Poziv za održavanje vanredne Skupštine sa prijedlogom dnevnog reda, vremenom i mjestom održavanja i potrebnim materijalima, dostavlja se delegatima Skupštine, članovima Upravnog odbora, entiteskim savezima, najkasnije u roku od 30 dana do dana održavanja Skupštine.

Delegati Skupštine ili entiteski savezi, mogu dostaviti prijedlog za izmjenu dnevnog reda najkasnije 15 dana prije održavanja Skupštine.

Prijedlozi za izmjenu i dopunu dnevnog reda sa obrazloženjem i eventualnim pisanim materijalima, dostavljaju se Upravnom odboru Saveza.

Prijedlozi kandidata za članove Upravnog odbora odnosno funkcije predsjednika i potpredsjednika, koje predlažu PS F BiH i PS RS, moraju biti dostavljeni pisanim putem Upravnom odboru Saveza, najkasnije 15 dana prije održavanja Skupštine.

Izabrani delegati za članove Skupštine Saveza, u smislu prethodnih stavova, moraju biti verifikovani na prvom sjednici Skupštine Saveza.

#### Član 20.

Odluke u Skupštini se donose javnim glasanjem, a samo izuzetno tajnim glasanjem. Skupština radi i odlučuje u skladu sa Statutom i Poslovníkom o radu. Skupština bira zapisničara na početku rada sjednice koji vodi zapisnik. Zapisnik mora da odražava bitan tok rada i suštinu svih odluka i stavova Skupštine.

#### Član 21.

Kvorum Skupštine za rad čini natpolovična većina delegata od kojih 5 (pet) mora biti iz jedne od članica osnivača Saveza.

Kvorum Skupštine, za pitanja izmjene i dopune Statuta i izbore u organe Saveza, je 23 (dvadesetri) delegata.

Odluka iz prethodnog stava je punovažna ako je za nju glasalo 2/3 članova od ukupnog broja članova Skupštine.

Kvorum od 17 (sedamnaest) delegata od kojih najmanje 5 (pet) mora biti iz jedne udružene članice je za sva ostala pitanja iz domena nadležnosti Skupštine Saveza.

Odluka iz prethodnog stava je punovažna ako je za nju glasalo nadpolovična većina članova od kojih 3 (tri) moraju biti iz druge članice.

#### Član 22.

Odluke o spajanju, podjeli ili prestanku rada Saveza, Skupština donosi 2/3 većinom glasova svih članova Skupštine.

#### Član 23.

Predsjednik Skupštine:

- stara se o organizovanju Skupštine i saziva njene sjednice,
- predlaže dnevni red sjednice,
- predsjedava sjednicama Skupštine,
- potpisuje akte donesene na Skupštini,
- stara se o izvršavanju odluka, zaključaka i drugih akata Skupštine,
- koordinira rad organa i tijela Skupštine,
- vrši i druge poslove koje mu odredi Skupština.

Predsjednika skupštine Saveza u slučaju spriječenosti ili odsutnosti mijenja Potpredsjednik Skupštine Saveza.

#### Član 24.

Skupština ima ovlaštenja da:

- donosi i mijenja Statut Saveza i druga akta određena ovim Statutom;
- donosi program rada Saveza i osnovne smjernice razvoja plivačkog sporta u BiH;
- razmatra i odobrava finansijske planove i izvještaje o finansijskom poslovanju Saveza;
- razmatra i odobrava izvještaje o radu organa Saveza;
- bira i razrješava predsjednika i potpredsjednika Saveza, predsjednika i potpredsjednika Skupštine Saveza, članove Upravnog odbora i predsjednika i članove Nadzornog odbora;
- bira i razrješava Generalnog sekretara Saveza;
- donosi odluku o imenovanju lica ovlaštenih za zastupanje i Saveza;

- razmatra i usvaja izvještaje koje podnese Upravni odbor i Nadzorni odbor Saveza;
- donosi odluku o promjeni naziva, sjedišta i znaka Saveza;
- donosi odluku o spajanju, podjeli i prestanku rada Saveza;
- usvaja i mijenja Poslovnik o radu Skupštine Saveza;
- donosi odluke o sistemu takmičenja na nivou Bosne i Hercegovine i nižim nivoima;
- donosi odluku o prijemu novih članica u Savez, u skladu sa Zakonom;
- donosi Poslovnik o radu Skupštine Saveza;
- donosi odluke o zahtjevima članova Saveza u drugom stepenu;
- donosi odluku o prestanku rada Saveza i raspodjeli preostale imovine nakon raspuštanja Saveza,
- obavlja i druge poslove koji nisu u nadležnosti drugih organa Saveza u skladu sa zakonom, ovim statutom i drugim aktima Saveza.

Predsjednik Saveza i Generalni sekretar ne mogu biti iz jedne članice udružene u Savez.

## 2. UPRAVNI ODBOR SAVEZA

### Član 25.

Upravni odbor Saveza je izvršni, operativni organ Saveza.

Upravni odbor čini 7 (sedam) članova iz redova članica Saveza, i to 4 (četiri) iz Plivačkog saveza FBiH i 3 (tri) iz Plivačkog saveza RS.

Nakon mandatnog perioda od četiri godine Upravni odbor čine 4 (četiri) člana iz Plivačkog saveza RS i 3 (tri) člana iz Plivačkog saveza Federacije BiH.

Bira ih Skupština na prijedlog članica Saveza.

Mandat članova Upravnog odbora je četiri godine.

Predsjednici entitetskih saveza (PS FBiH i PS RS) mogu biti u sastavu Upravnog odbora Saveza.

### Član 26.

Upravni odbor radi na sjednicama, u skladu sa Poslovnikom o radu.

Upravni odbor svoje sjednice održava najmanje jednom u tri mjeseca, a vanredno po potrebi.

Kvorum Upravnog odbora je 5 (pet) članova od kojih 2 (dva) moraju biti iz druge članice, a za punovažnu odluku potrebna su najmanje 2 (dva) glasa iz jedne udružene članice.

Članovi Upravnog odbora imaju jednaka prava, dužnosti i odgovornosti u radu Upravnog odbora.

### Član 27.

Svaki kandidat za člana Upravnog odbora potvrđuje volju za prihvatanje funkcije, člana ovog tijela Saveza, pred Skupštinom Saveza.

Generalni sekretar je dužan zapisnik sa sastanka Upravnog odbora dostaviti u roku sedam dana članovima Upravnog odbora.

Ako je član Upravnog odbora Saveza trajno spriječen u obavljanju funkcije, biće zamijenjen odlukom upravnog odbora entitetskog saveza, do isteka mandata zamjenjenog člana. Skupština PS BiH na prvoj narednoj sjednici verifikuje ove promjene.

Svaki član Upravnog odbora Saveza mora biti predložen od strane entitetskog saveza.

## Član 28.

Upravni odbor:obavlja naročito slijedeće poslove:

1. priprema sjednice Skupštine;
2. priprema i predlaže nacrt Statuta i drugih opštih akata, koje donosi Skupština Saveza, i njegovih izmjena i dopuna;
3. provodi politiku, zaključke i druge odluke koje je donijela Skupština;
4. upravlja imovinom Saveza;
5. podnosi godišnji ili periodični izvještaj o svom radu Skupštini Saveza na usvajanje;
6. obezbjeđuje provođenje Statuta i drugih opštih akata i odluka Skupštine;
7. donosi opšte akte iz svoje nadležnosti;
8. utvrđuje prijedloge godišnjih i srednjoročnih programa rada i finasijskih planova;
9. donosi odluku o visini godišnje članarine;
10. koordinira rad i razvija saradnju sa drugim organizacijama radi uspješnog ostvarivanja rada Saveza;
11. razmatra i rješava žalbe članova u prvom stepenu;
12. prati provedbu finasijskog plana i donosi odluke o upotrebi sredstava;
13. priprema izvještaje, analize, informacije i druge materijale za Skupštinu;
14. donosi poslovnik o svom radu, radu komisija drugih tijela;
15. određuje naredbodavca i utvrđuje ovlaštenja za finasijsko poslovanje;
16. utvrđuje politiku međunarodne sportske saradnje i program međunarodnih takmičenja;
17. donosi pravilnik Saveza, o disciplinskoj i materijalnoj odgovornosti;
18. odlučuje o organizaciji i načinu obavljanja stručnih i administrativno-tehničkih poslova za potrebe Saveza;
19. osniva stalna i povremena radna tijela - komisije, odbore, imenuje i razrješava njihove predsjednike i članove i potvrđuje im programe rada;
20. razmatra izvještaje o radu stalnih i povremenih radnih tijela;
21. utvrđuje programe i planove Saveza;
22. donosi Pravila i propozicije organizovanja i provođenja prvenstvenih takmičenja Saveza;
23. utvrđuje kalendar i odlučuje o mjestima održavanja državnih plivačkih prvenstava i međunarodnih takmičenja i njihovim organizatorima;
24. donosi Poslovnik o radu Upravnog odbora Saveza;
25. daje tumačenja opštih akata Saveza;
26. obavlja i druge poslove u skladu sa Zakonom, i ovim Statutom ili ukoliko mu to odredi Skupština Saveza.

## **Predsjednik i Potpredsjednik Upravnog odbora**

### Član 29.

Predsjednik i potpredsjednik Upravnog odbora Saveza Savez u pravnom prometu;

- saziva i predsjedava sjednicama Upravnog odbora,
- potpisuje akte koje donosi Upravni odbor;
- za svoj rad odgovoran je Skupštini Saveza,
- izdaje naloge za izvršenje plana prihoda i rashoda,
- vrši i druge poslove za koje je ovlašten statutom ili koje mu povjeri Skupština. U odsustvu Predsjednika Upravnog odbora, mijenja ga Potpredsjednik Upravnog odbora, u svim poslovima iz prethodnog stava i u poslovima zastupanja.



Mandat predsjednika i potpredsjednika Upravnog odbora traje 4 godine.  
Predsjednik i Potpredsjednik Upravnog odbora su iz različitih članica.  
Ukoliko je Predsjednik trajno spriječen da obavlja funkciju, funkciju vršioca dužnosti predsjednika obavlja Potpredsjednik sve dok Predsjednik ne bude zamijenjen, u skladu sa odredbama ovog Statuta  
Predsjednik i Potpredsjednik Upravnog odbora su ujedno Predsjednik i Potpredsjednik Saveza.

#### Član 30.

Članu Upravnog odbora mandat može prestati i prije vremena na koji je izabran:

- opozivom od strane članice Saveza koja ga je predložila,
- suspenzijom od strane Skupštine ili Upravnog odbora,
- ostavkom,
- nastankom okolnosti usljed kojih nije u mogućnosti obavljati svoju dužnost.

Članu Upravnog odbora izabranom na mjestu člana, kojem je prestao mandat u skladu sa stavom 1. ovog člana, mandat traje do isteka mandata Upravnog odbora istog saziva.  
Ostavka se ne razmatra nego se samo konstatuje.

#### Član 31.

Upravni odbor Saveza ima mandat da zatraži smjenu člana, koji ne prisustvuje tri puta za redom sjednicama Upravnog odbora Saveza, te ako se dokaže da je kriv za teške propuste u obavljanju svojih zadatka ili da je neispravno postupio, i da zahtjeva od nadležnog entitetskog saveza zamjenskog člana do isteka mandata, uz obaveznu verifikaciju na prvoj narednoj Skupštini.

### 3. NADZORNI ODBOR

#### Član 32.

Nadzorni odbor broji tri člana, predsjednika, potpredsjednika i jednog člana.

Predsjednik i Podpredsjednik ne mogu biti iz iste udružene članice.

Mandat članova Nadzornog odbora je 4 (četiri) godine.

Članove Nadzornog odbora bira Skupština.

Članovi Nadzornog odbora ne mogu biti članovi Upravnog odbora.

Sjednice Nadzornog odbora saziva predsjednik Nadzornog odbora po sopstvenoj ocjeni i na zahtjev Predsjednika Upravnog odbora ili Generalnog sekretara..

Opoziv članova Nadzornog odbora obavlja se na način i po postupku propisanom za njihov izbor.

Nadzorni odbor odluke donosi konsenzusom.

#### Član 33.

Nadzorni odbor ima nadležnost da:

1. nadzire zakonitost u finansijskom poslovanju Saveza;
2. nadzire izvršavanje ugovornih i drugih obaveza i
3. prati i analizira ostvarivanje finansijske politike i finansijskog plana Saveza.

Nadzorni odbor ima zadatak da kontroliše:

- ❖ primjenu Statuta i drugih akata Saveza;
- ❖ finansijsko poslovanje Saveza;
- ❖ namjensko korištenje i raspolaganje sredstvima Saveza i
- ❖ druge poslove koje mu se stave u nadležnost ili proističu iz propisa ili zakona.

Bez saglasnosti Nadzornog odbora, na Skupštini se ne može usvojiti finansijski izvještaj. U slučaju težih kršenja Statuta i drugih akata Nadzorni odbor može sazvati vanrednu Skupštinu. U izvršenju postavljenih zadataka, Nadzorni odbor ima pravo da vrši uvid u svu dokumentaciju Saveza.

Nadzorni odbor podnosi izvještaj o svom radu Skupštini Saveza najmanje jednom godišnje. Skupština, ukoliko postoji potreba, može donijeti opšti akt kojim se bliže uređuju ovlašćenja i način rada Nadzornog odbora u vršenju nadležnosti utvrđene ovim Statutom.

#### **4. PREDsjedNIK I POTPREDsjedNIK SAVEZA**

##### Član 34.

Savez ima Predsjednika i Potpredsjednika Saveza koje bira i razrješava Skupština Saveza na period od 4 (četiri) godine.

Predsjednik i Potpredsjednik Saveza:

1. zastupaju i predstavljaju Savez u pravnom prometu;
2. sazivaju sjednice Upravnog odbora i predsjedavaju njima;
3. potpisuju opšta i druga akta koja donosi Upravni odbor;
4. prate provođenje programa rada Saveza, kao i odluka i zaključaka Upravnog odbora Saveza;

Predsjednika Saveza u odsutnosti mijenja Potpredsjednik Saveza.

Predsjednik i Potpredsjednik Saveza su istovremeno i Predsjednik i Potpredsjednik Upravnog odbora.

#### **5. GENERALNI SEKRETAR**

##### Član 35.

Savez ima Generalnog sekretara kojeg imenuje Skupština na mandatni period od 4 (četiri) godine.

Generalni sekretar obavlja sve administrativno-tehničke poslove Upravnog odbora i Skupštine i nema pravo glasa niti izbora u organe Saveza.

Generalni sekretar može svoje poslove obavljati profesionalno do punog radnog vremena u skladu sa Zakonom o radu, o čemu odluku donosi Skupština Saveza.

##### Član 36.

Generalni sekretar obavlja sljedeće poslove i zadatke:

- zastupa Savez u pravnom prometu;
- priprema i organizuje pripremu normativnih akata ili drugih materijala koji se razmatraju na sjednicama Skupštine, Upravnog odbora i drugim organima i tijelima Saveza;
- sprovodi i prati sprovođenje odluka Saveza;
- vodi brigu o zakonitom radu organa Saveza;
- izvršava odluke Saveza finansijskog karaktera;
- vodi poslove registracije klubova, plivača, trenera i ostalih članova Saveza;
- radi i druge poslove po ovlašćenju Upravnog odbora, u skladu sa Statutom.

#### Član 37.

Upravni odbor Saveza može, za obavljanje određenih poslova, formirati stručna, stalna ili privremena tijela Saveza, o čemu donosi odluku, kojom se utvrđuje broj, sastav, i zadaci. Posebnom odlukom Upravni odbor utvrđuje uslove i mandat članova stručnih komisija. Komisija razmatra, pitanja zbog čega je formirana, i daje prijedloge Upravnom odboru.

### **VI -ZASTUPANJE SAVEZA**

#### Član 38.

U odnosima sa trećim licima Savez zastupaju Predsjednik i Potpredsjednik Saveza i Generalni sekretar Saveza.

U postupcima u kojima Savez učestvuje kao stranka radi ostvarivanja svojih prava, dužnosti i odgovornosti pred nadležnim organima, Predsjednik i Potpredsjednik Saveza mogu dati pisanu punomoć za zastupanje advokatu ili drugom stručnom licu.

### **VII- SREDSTVA ZA RAD SAVEZA**

#### Član 39.

Imovinu Saveza čine prava, stvari i novac , koje Savez stiče u skladu sa Zakonom i ovim Statutom.

#### Član 40.

Savez može ostvariti sredstva:

- iz državnih subvencija i ugovora sa državom, javnim institucijama, domaćim i stranim fizičkim i pravnim licima,
- iz dobrovoljnih priloga i poklona javnih institucija, fizičkih i pravnih osoba, kako inostranih tako i domaćih, u gotovini, uslugama ili imovini bilo koje vrste,
- iz sredstava ostvarenih od strane osnovanih subjekata za privredu i druge djelatnosti Saveza, a u skladu sa propisima,
- iz prihoda od kamata, dividendi, dobiti od kapitala, zakupnina, honorara i sličnih izvora pasivnog prihoda,
- od igara na sreću, u skladu sa propisima,
- od udruženih članica,
- od članarina i kotizacija,
- iz prihoda stečenih kroz ostvarivanje ciljeva i aktivnosti Saveza, kako je određeno Statutom, kao i iz drugih izvora finansiranja u skladu sa propisima.

#### Član 41.

Obim, namjera i raspodjela finansijskih sredstava utvrđuje se finansijskim planom Saveza kojeg donosi Skupština, na prijedlog Upravnog odbora.

O upotrebi sredstava, u skladu sa finansijskim planom odlučuje Upravni odbor.

Naredbodavac za izvršavanje Finansijskog plana i Programa rada je Predsjednik i Potpredsjednik Saveza.

#### Član 42.

Sredstva Saveza se mogu upotrebljavati isključivo radi ostvarivanja ciljeva i djelatnosti Saveza.

#### Član 43.

Nadzor nad upotrebom i raspolaganjem sredstava Saveza vrši Nadzorni odbor.

Predsjednik Nadzornog odbora je dužan o pravilnosti i ispravnosti trošenja sredstava Saveza izvještavati Skupštinu najmanje jednom u tri mjeseca.

O svakoj uočenoj nezakonitosti u trošenju i raspolaganju sredstvima Nadzorni odbor je dužan odmah izvjestiti predsjednika Skupštine koji će u roku od 15 dana sazvati vanrednu Skupštinu.

### **VIII - NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU**

#### Član 44.

Predsjednik, Potpredsjednik i članovi Upravnog odbora imaju zakonski mandat i odgovornost za finansijsko-materijalno upravljanje udruženjem.

Godišnji finansijski izvještaj predstavlja izvještaj na obrascima propisanim zakonom o poslovanju udruženja sa poslovanjem prema kontnom planu za Savez.

Godišnji izvještaj priprema i potpisuje Predsjednik Saveza i isti dostavlja zakonom predviđenim nadležnim organima.

#### Član 45.

Rad Saveza zasniva se na načelima javnosti.

Javnost rada Saveza se ostvaruje na način utvrđen Zakonom i ovim Statutom.

O javnosti rada Saveza brine Upravni odbor Saveza i Generalni sekretar Saveza.

#### Član 46.

Javnost rada se obezbjeđuje:

- javnim održavanjem sjednica,
- blagovremenim i objektivnim informisanjem svih članica o radu Saveza,
- stalnom saradnjom sa predstavnicima sredstava javnog informisanja,
- objavljivanjem odluka organa Saveza,
- primjena ostalih dostupnih oblika upoznavanja javnosti.

#### Član 47.

Članovi Saveza imaju pravo da budu informisani o radu svih organa Saveza. Za informisanje članova Saveza zadužen je Predsjednik Upravnog odbora.

## **IX DISCIPLINSKA PRAVILA**

### **Član 48.**

Disciplinske mjere mogu biti izrečene za nesportsko ponašanje, povredu i prekršaj Statuta Saveza, Pravilnika ili odluka donesenih u skladu sa njima.

### **Član 49.**

Detaljan način podnošenja prijava, izricanja mjera, kao i način podnošenja žalbe biće definisan Disciplinskim pravilnikom, koji donosi Upravni odbor Saveza .

## **X UDRUŽIVANJE**

### **Član 50.**

Savez se može udruživati i postajati članom drugih domaćih i međunarodnih asocijacija udruženja i drugih Saveza u skladu sa Zakonom i ovim Statutom.

Odluku o načinu udruživanja donosi Skupština na prijedlog Upravnog odbora Saveza.

Na osnovu odluke nadležnog organa, Savez se može udruživati u Olimpijski komitet Bosne i Hercegovine, u skladu sa Zakonom..Savez će se zalagati za učlanjivanje u Svjetsku plivačku federacije – FINA i Evropsku plivačku federaciju – LEN, i odredbe ovog Statuta ne mogu biti u proturječnosti sa Statutima ovih federacija.

## **XI - POSTUPAK ZA DONOŠENJE STATUTA, IZMJENE I DOPUNE STATUTA, OVLAŠTENJE I NAČIN DONOŠENJA DRUGIH OPŠTIH AKATA**

### **Član 51.**

Osnovni opšti akt Saveza je Statut.

Savez može donositi i druge opšte akte: pravilnike, odluke i poslovnike.

Opšti akti moraju biti saglasni Zakonu i Statutu.

Pojedinačni akti su odluke, zaključci, uputstva i mišljenja.

### **Član 52.**

Na sastancima organa upravljanja i njegovim komisijama obavezno se sačinjavaju zapisnici.

Zapisnici moraju odražavati tok rada sastanka i sadržavati odluke koje su donijeli organi upravljanja na svojim sjednicama.

Zapisnici moraju biti potpisani.

Inicijativu za izmjene i dopune Statuta može podnijeti svaki član Saveza. Inicijativa se podnosi Upravnom odboru pisanim putem i sa odgovarajućim obrazloženjem.

Utvrđeni prijedlog Statuta dostavlja se na razmatranje i usvajanje Skupštini, najmanje petnaest dana prije održavanja Skupštine.

#### Član 53.

O izmjenama i dopunama Statuta odlučuje Skupština dvotrećinskom većinom glasova svih članova Skupštine.

Predsjednik Skupštine potpisuje odluku o izmjenama i dopunama Statuta koji se smatraju originalom i čuvaju u arhivi Saveza.

### **XII- OPIS, OBLIK I SADRŽAJ PEČATA, ŠTAMBILJA I ZNAKA SAVEZA**

#### Član 54.

Savez ima pečat, znak, štambilj i zastavu.

Pečat je okruglog oblika prečnika 3,5 cm i po obodu ima ispisan tekst latiničnim i ćiriličnim pismom: Plivački savez Bosne i Hercegovine - Пливачки савез Босне и Херцеговине, a u sredini je upisano sjedište Laktaši i znak Saveza.

Štambilj je pravougaonog oblika, služi za protokol, ima ispisan tekst latiničnim i ćiriličnim pismom: Plivački savez Bosne i Hercegovine - Пливачки савез Босне и Херцеговине, a ispod naziva je upisano sjedište Laktaši, sa prostorom za broj i datum akta.

#### Član 55.

Savez ima svoj znak. Znak Saveza je stilizovani lik plivača. žuto-plave boje.

### **XIII- USLOVI POSTUPKA ZA SPAJANJE, PODJELU I PRESTANAK RADA SAVEZA**

#### Član 56.

Savez se može spojiti ili podijeliti u drugo udruženje u skladu sa Zakonom.

Odluku iz prethodnog stava donosi Skupština dvotrećinskom većinom glasova svih članova Skupštine.

#### Član 57.

Savez prestaje sa radom dobrovoljno ili po sili Zakona.

- Incijativu za dobrovoljni prestanak rada Saveza može dati Upravni odbor Saveza ili 1/3 (jedna trećina) članova Skupštine Saveza u slučaju;

- proteka dvostruko više vremena utvrđenog Statutom za održavanje Skupštine, a Skupština nije održana,

- ako se broj udruženih osnivača smanji u skladu sa članom 22. stav 3. Zakona o sportu u Bosni i Hercegovini.

Odluku o dobrovoljnom prestanku rada donosi Skupština 2/3 (dvotrećinskom) većinom svih članova Skupštine Saveza.

#### Član 58.

Savez prestaje sa radom po sili zakona, u skladu sa odredbama čl. 50. i 51. Zakona.

Savez je obavezan svaku statusnu promjenu prijaviti nadležnom ministarstvu u roku utvrđenom zakonom..

#### **XIV- PRAVILA ZA RASPODJELU PREOSTALE IMOVINE U SLUČAJU PRESTANKA RADA SAVEZA**

##### **Član 59.**

Istovremeno sa odlukom o prestanku rada Saveza, Skupština donosi plan likvidacije Saveza, kojim se utvrđuje raspored imovine, prava i obaveze Saveza.

Skupština Saveza imenuje likvidatora čija je dužnost da se stara o izvršenju plana likvidacije i ovlašten je da zastupa Savez u postupku likvidacije i u postupku podnošenja zahtjeva za prijavu prestanka rada Saveza nadležnim organima.

Imovina kod raspuštanja Saveza, nakon izmirenja svih zakonskih obaveza, dodjeljuje se drugom udruženju – savezu, koje obavlja iste ili slične statutarne djelatnosti, a na osnovu odluke Skupštine.

#### **XV ZAVRŠNE ODREDBE**

##### **Član 60.**

Tumačenje odredaba ovog Statuta daje Skupština.

##### **Član 61.**

Statut stupa na snagu danom donošenja, a primjenjivaće se od dana upisa u registar kod nadležnog Ministarstva.

Sarajevo 12.11.2011.godine

Broj: 12-11-2/11.

Predsjednik Osnivačke Skupštine Saveza

Bojan Kozomara